



Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 3 Yangia anidakangma : f Tir Yimiyim

Instagram tiryimiyim@aolima

YouTube tir yimiyim TAPAK 8

Assam: Majuli Apu November ita nungi yanglu tenzüksü

Linük yutsür aoba asoshi tatok meshir: Ashraf Ghani



VOL. XVIII NO. 328 (ADOK 328) DIMAPUR ROGONÜ (FRIDAY) RONGJUI (SEPTEMBER) 10, 2021 ₹ 5.00

Governor-i Phek district kübok yimtsüing kar semdang

Dimapur, Rongjui/Sept. 09 (TYO): Nagaland Governor, R.N. Ravi ajanga September 9, 2021 nü Phek district kübok Chozuba, Ruzhazo aser Yoruba yimtsüingtem semdanga liasü.

Pai mezüingbuba nung Japan Riba Govt. High School, Chozuba semdanga yangji Chozuba Village Council züingsemtem den sensaksem kaa liasü.

Iba sülen pai Ruzhazo yimtsüing semdanga liasü, koba India nung British nung yimsüüba nungi nüji anguba yimtsüing mezüingbuba aser 1944 kum Netaji Subhash Chandra Bose indang Azad Hind sorkari yimsü süa liasü.

Iba yimtsüing nung British nung anema Nagaland nung raraba mapang Netaji anenzükba ki pai semdanga liasü aser yangji pai Ruzhazo Village Council züingsem aser lokti tentet balala

Nüburtem aliba tesem nung mask magirtem merenshitsu

Dimapur, Rongjui/Sept. 09 (TYO): State nung COVID-19 tashidak wara prokshiba nungi jenbua alitsü mechi sorkari totuyuba agütsüba nung aibelena nisung jenti nüburtem aliba tesem nung mask magi senzüba angur.

April 29, 2021 nü sorkari sangdong ka agütsüba nung, mask magi senzür dang aibelen shia senchi sen 200 achitsü shia lir, ta sangdong ka ajanga ashi.

Iba ozüing amshitsü asoshi Police nung ASI nungi temaba officer aser Transport Department nung Assistant Road Safety

Nagaland COVID-19: Taneptsü angur 70 & cases tasen 25 liasü

Kohima, Rongjui/Sept. 09 (TYO): Tanü Nagaland nung COVID-19 cases tasen dang nungi taneptsü angur timba liasü. Ghonda 24 tsüingta state nung iba tashidak nungi taneptsü angur nisung 70 liasü aser cases tasen 25 liasü, aser ibaji ajanga caseload 30,510 ajunger.

"Tanü COVID-19 positive cases 25 putetba ya Dimapur nungi 10, Kohima nungi tenet, Mokochung aser Wokha nungi ana-na, Kiphire, Longleng, Mon aser Phek nungi ka-ka liasü," ta State Nodal Officer for Integrated Disease Surveillance Project, Dr Nyanthung Kikon ajanga anogoshi COVID-19 osang agütsüba nung ashi.

"Tesüiba ghonda 24 tsüingta taneptsü angur nisung 70 ya Dimapur nungi 21, Kohima nungi 18, Mokochung nungi ter, Zunheboto nungi ti, Phek nungi tenet, Wokha nungi asem, Kiphire, Mon aser Tuensang nungi kaka alitsü," ta pai ashi.

Tanü tashinung state nung COVID-19 nungi taneptsü angur nisung 28,296 alitsü aser taneptsü anguba rate ya shilem 92.74 alitsü.

Tang state nung nisung 659 dak COVID-19 keta lir aser item rongnung nisung 101 dak iba tashidak agi timtem sümia agütsür, nisung 12 tera timtema oxygen nung lir, nisung 23 kanga timtema oxygen nung lir, nisung 11 kangasa mejung ventilator maden ICU nung lir, nisung 9 ventilator nung lir aser nisung 556 temang nung iba

den sensaksema liasü.

Pai iba mapang Poswuyi Swuro ajurua liasü, shiba nüjiso asoshi rarar nübu ka lir aser Netaji-i yimtsüing nung Dobashi ka ama shimteta liasü. Iba mapang Swuro-i pa Netaji den yaritepba otsü shia liasü.

Governor R.N. Ravi-i Yoruba yimtsüing semdanga yangji putu menden züingsemtem den sensaksem aka. Yimtsüing asem nung aliba nüburtemi pa pelashishia agizükba aser anepaluba atema Governor-i pelaba lemsatet aser item yimtsüing terenlok asoshi akokba nung yariteptsü ashi.

India nung nüjiso bushiba tsütsü yimtsüing asem ya puti otsü tajung alinung, tim konang tetushi agütsütsü, ta pai ashi.

Paisa district nung tang teyangludak National Highway tsüingtong oa semdanga liasü.

&Enforcement Inspector aser temaba officer nem tashi agütsüba nung mask agidaksütsü aser aibelener nem temerenshi agütsütsü atema tekeratiba nung mera agütsü asoshi District Task Forces ajunga nem totuyuba agütsüogo.

Maneni public places nung mask magi senzüba aliba aser aibelener dang nungi senchi bendenba indang osangtem anogoshi State Level War Room nem agütsütsü asoshi District Task Forces ajunga nem totuyuba agütsüogo, ta sangdong ajanga ashi.

tashidak agi timtem agütsüba mali, ta pai ashi.

Kasa mapang iba tashidak ajanga asü-amaba meliasü, anungji tang tashinung iba tashidak keter asür nisung 634 lir aser item rongnung nisung 14 bo danga tashidak agi asüba alitsü, ta pai ashi.

COVID-19 agi shiranger nisung 921 danga state temi ogo, ta paisa ashi.

Tang tashinung COVID-19 tashidak alitsü südi ta temolung melemi Nagaland nung sample 340,791 tendangogo. Item ya RT-PCR nung 106,779, TrueNat nung 78,720 aser Rapid Antigen Test nung 152,292 tendanga lir, ta Dr Kikon-i ashi.

Nagaland nung Bodhbarnü tashinung nisung 666,380 nem COVID-19 vaccine doses 905,994 agütsüogo, ta State Immunization Officer, Dr Ritu Thurr-i metetdaksü.

State nung iba mozü agir alirtem ya frontline nung inyaker nisung 60,859, healthcare nung inyaker nisung 15,993, arishi kum 45 tema nisung 194,405 aser arishi kum 18 nungi 44 tsüingta nisung 395,123 alitsü, ta pai ashi.

Nisung 239,614 nem iba mozü dose tanabuba agütsüba parnok vaccine course temogo. Parnokya frontline nung inyaker 45,061, healthcare nung inyaker 13,022, arishi kum 45 nungi tema 119,049 aser arishi kum 18 nungi 44 tsüingta nisung 62,482 alitsü, ta Dr Thurr-isa ashi.

IOC ajanga Nagaland nung 95 octane petrol sayaogo



Dimapur nung high octane petrol semzükba sentong nung Director, Food & Civil Supplies, V. Lovitoly Sema; Deputy General Manager (Ops), IOC, Dimapur Depot, Huwuto Sema aser dangartem külemi tangokba noksa ka yangi angur.

Dimapur, Rongjui/Sept. 09 (TYO): Totzü temürek aser mileage tajungba agütsütsü mechi Indian Oil Corporation (IOC) ajanga high octane petrol (XP-95) sayaogo.

High octane petrol ya Northeast nung state ana - Assam aser Nagaland kising nung saya liasü.

IOC Dimapur depot nung iba petrol sayaba sentong ka September 9, 2021 nü agiba nung jembiba mapang, Indian Oil Corporation ajanga tzü-mopung nem timtem magütsüba aser tajanzük agütsüba petrol jenjang tajung bener aruba atema Director, Food & Civil Supplies, V. Lovitoly Sema-i pelaba lemsatet liasü.

Teti amshiba petrol dang

nungi XP-95 ya lenmang aisu nung tajungba lir, koba agi mileage tajungba agütsür, engine nem tashi tali agütsür aser gari yanglurtem asoshia tajanzük lir, ta lai ashi.

State nung iba product ya takok nua amshitettsü asoshi nüburtem nem awareness agütsüba nung temolung agütsütsü asoshi lai IOC dang mepishia liasü.

Deputy General Manager (Ops), IOC, Dimapur Depot, Huwuto Sema-i ashiba agi, teti amshiba tang market nung anguba petrol ya 91 octane lir aser tang tasenba totsü, XP-95 nungya 95 octane lir.

Corporate fuel average economy norms shidak alitsü atema Society of Indian

Automobile Manufacturers ajanga mapang talangka nungi XP-95 gasoline ya market nung amshitsü yongya liasü.

Iba den meden sür linük tesem ajungalen BS-VI product tem amshi tenzükba sülen Indian Oil Corporation Limited ajanga May 1, 2021 nungi octane timba aliba XP-95 ya amshi tenzük,

Teti amshiba petrol dang nungi iba totzü tasenba yagi engine knocking tajemba kumdaksütsü aser engine-i mapa inyakra tajungba kumdaksütsü aser gari yanglurtem asoshi tongtipang ka akumer.

XP-95 additive ya ethanol melena lir aser iba totzü ya North East nung aliba IOC refinery source nung ano kum ka angütsü.

Minister Pangnyu-i CHC Kezocha semzüksü

Kohima, Rongjui/September 9 (TYO): Nagaland Minister for Health & Family Welfare S Pangnyu Phom-i tanü Kohima district kübok Kezochazou range nung yimtsüing ti atema Community Health Centre (CHC) ka semzüksüogo.

Tang aliba Primary Health Center (PHC) Kezocha ya kum 32 sülen CHC-i ajungkettsüogo.

Sentong nung o jembiba mapang Phom-i, PM Narendra Modi-i anir BJP sorkari linük nung aliba nüburtem nem health care services tajungtiba agütsütsü sentong lir aser state nunga Chief Minister Neiphiu-i anir sorkari health care services tajungtiba agütsütsü süoki ia agidar, ta ashi.

Rio lenisüba nung PDA sorkar aser local MLA Zale Neikha aser taoba BJP president Visasolie Lhoungou nungeri iba PHC ya CHC-i ajungkettsü atema teyari agütsü, ta pai ashi. Service tajungba agütsütettsü atema nüburtemi iba CHC anepalutsüla ta pai ashi.

Minister-isa, permanent doctor den medical staff yoktsü aser maneni tenüingdakba apir mozüki jenjangi ajungkettsü atema tenanzükba agütsü, kechiyong nisung ajaki medical teyari nungdaker, ta ashi.

Paisa, CHC amenoktsü atema ali kiburtemi kechi timtem magütsüba atema parnok dang kanga pelaba lemsatet aser nüburtemi iba tatishitsü tajung maneni sayutsü imlaba lemsatet.

Kasa mapang nung minister-i COVID-19 wara dak sendakba nung tangazükba balala agütsüba den vaccine agiba dak alak iba tashidak nungi jenbotsü atema tanga lenmang kecha mali ta ashi.

Vaccine ajanga temang nung timtem agütsür mesera iba ya Khristan tamangba anema ta olulu osang prokshiba dak mamangtsü mepeshiba den Arogo balala dang vaccine agiba tajanzük indangang lemsateptsü mepeshi. Maneni pai Covid tashidak mapang shidak nung tendanga anepalusü ayongzük.

PDA sorkari terenlok maparen balala agütsütsü atema meranga inyakdar saka COVID wara pokteter aliba ajanga benoka minyakteter, ta pai ashi. Ajisüaka lenla ajak nung terenlok asoshi PDA sorkar bendanga agütsür lir ta shia Phom-i nüburtem dang taruba election nunga parnok nem teyari agütsütsü mepeshi.

Kasa mapang nung PWD (Housing) minister Tongpang Ozukum-i, health care service atema CHC ya kanga tongtibang aser nüburtemi iba facility takok tashi amshitsüla ta ashi. Paisa, sorkari agütsüba maongka magi-i nija mozükitem nung nüburtemi sen aika intoker ta shia iba facility anepalua amshitsü ayongzük.

Local MLA & Advisor for Youth Resources and Sports, Zale Neikha-ia, Kezocha PHC ya CHC jenjangi ajungkettsüba atema kanga pelaba lemsatet. Pai Kezocha PHC ya CHC-i

ajungkettsü atema benokba Minister Phom-i agizükba atema pelaba lemsatet.

Maneni Principal Director of Health and Family Welfare, Dr. Neikiekhrlie Khimhiao-i, iba PHC, CHC jenjangi ajungketba atema pelaba lemsatet aser local MLA Zale Neikha lenisüba dak temulung asüba lemsatet liasü.

Pai, state sorkari Kezocha range nung aliba nüburtem atema süoki ia bilema iba health institution ajungkettsüogo aser nüburtemi iba ya sempet tulu ka ama agizüksüla, ta ashi.

Linük nung nüburtem aika covid tashidak agi asür saka state nungbo nisung ka danga oxygen agi anungba ajanga asüba osang mali, ta Dr. Neikiekhrlie-i shia, sorkari mapang shidak nung jenjang tapet agiba atema tenüngsang agütsü, ajita mesera tensa tamajungba kümer lila, ta ashi.

Sentong nung o tatsüka jembiba mapang DC Kohima Gregory Thejawelie-i, iba CHC ajanga Kezo range nung aliba nüburtem ajanzüksütsü imlaba lemsatet. Pai, DHFW dang iba facility ajanga nüburtem ajanzüksütsü atema nübu aser specialized doctor tem yoktsü mepeshi. DC-isa, COVID-19 atema vaccine agiba dak sendakba nung tebilemstü akaba lemsatetba den ajak dang COVID dak sendakba yimiyimpong shidak benshitsu mepeshia metetdaksü.

Tobu nung Excavator ka bendanga agütsüba sentong agi



Tobu Town Council atema mejeta aliba Excavator ka bendanga agüja meshitetba sentong ka September 9 nü ADC Office Tobu nung agiba sülen tangokba noksa nung angur.

Dimapur, Rongjui/September 9 (TYO): Fourteenth Finance Commission, Basic Grants ajanga Tobu Town Council atema mejeta aliba Excavator ka bendanga agüja meshitetba sentong ka September 9 nü ADC Office Tobu nung agiogo. Iba Excavator meshitetba sentong ya Tobu Town Baptist Church pastor J. Tongpang-ichaayanga agi.

Iba sentong ya EAC Tobu Tsidi lenisüba nung agi aser NCS ADC & Administrator Tobu Town Council Keyirangding Hegui-i okila o jembia liasü. O jembiba mapang pai Excavator aliba nükjidong lemsatep, koba Jila aser Sub division nung terenlok maparen (kilentsü

merekba, anentsü merekba, lenmang yanglushiba) atema amshitsü aser kasa mapang nung Tobu Town Council kübok maparen balala inyakba ajanga senotsü aazüksü nükjidong nung ali, ta ashi. Paisa sentong nung shilem agirtem aser ketdangsürtem dang iba Excavator ya pei meyong ama anepalu amshitsü aser odangtetsüsa amshitsü ajungshi.

Maneni iba sentong nung Konyak Union (Tobu Unit), Tobu Area Students' Union, Konyak NyupuhShekoKhong (Tobu Unit), Tobu Town Students' Union, tirtem, Ward Chairman Union, Head Gaonbura temi o tatsütsü jembia aser parnoki Chief Minister Neiphu Rio aser Advisor Municipal Affairs and Urban

Development Dr. Neikiesalie Nicky Kire na dang iba mapang tajung asoshi kanga pelaba lemsatepa liasü. Parnokisa Tobu tesem nung aliba nüburtem nüngdakattem peritsütsü asoshi bendanga agüja inyakba atema MLA 55A/C Tobu & Advisor DUDA, Government of Nagaland N. Bongkhao Konyak aser Department of Municipal Affairs-i parnoki benokba asadanga agizükba aser takaratiba nung senotsü teyari agütsüba atema kanga pelaba lemsatep.

Sentong nung Parish Priest Catholic Church Tobu Rev. Fr. Anthony Samy aser Pastor NCRC Tobu Shellen nati tetenzük aser tatembang sarasadem agia liasü.

NECTAR-i otsünü zülutepba tetoktepba ayongzüker

Dimapur, Rongjui/September 9 (TYO): Department of School Education kübok Nagaland Education Project- The Lighthouse (NECTAR)-i otsünü zülutepba tetoktepba ka ayongzüker metetdaksüogo. Iba tetoktepba ya 'Educational Vision: Best Practices in School Governance and Management' onük nung ajemdaker tokteptsü koba Nagaland nung sorkar school tesayur tem atema asütsü. NECTAR nükjidongji Nagaland nung kaket shisatsü bushiba jenjang ajungkettsü

aser inyakyim melenshitsü atema lir. Iba tetoktepba nung Nagaland kübok sorkar school tem ajak nungi tesayurtemi shilem agitettsü aser takoker nem Android Tablet amala aser school tem nem school nung nüngdakba osettsüt balala agütsütsü.

Tetoktepertem rongnung tajungtiba nem Android Tablet ka agütsütsü aser school nem sen 20,000 alang osettsüt balala agütsütsü. Tajungtiba 12 dak alia district shia nungi nisung kaka nem Android Tablets agütsütsü aser school nem sen

8000 alang osettsüt balala agütsütsü.

Otsünü benoktsü atema tatembangbuba anogoji September 20 nü nikongtsütsü 6:00 ako tashi asütsü. Atakzükja aliba anogo süitemba sülen magizüktsü. Otsünutem ya school ketdangsürtem ajanga dang contact@nagalandeduproject.com mesera Whatsapp Phone number 9863605643 dangi yoktettsü. Osang tejangjaba agitsü atema www.education.nagaland.gov.in semdangang, ta ketdangsür sangdong ka ajanga metetdaksü.

Longleng DPDB senden menogo



DPDB senden September 8 nü DC office DPDB hall nung aliba noksa nung angur.

Dimapur, Rongjui/September 9 (TYO): September ita atema Longleng District Planning & Development Board senden September 8 nü DC office DPDB hall nung Deputy Commissioner & Vice Chairman DPDB M. Shayung Phom lenisüba nung menogo.

Senden nung DC-i züngsemtem pela agizük aser züngsem tasen; Superintendent of Police Longleng Kuhevi Sema aser DFO Longleng Suviu na mejeta pelashishia agizük.

Principal, Bautung Government Higher Secondary School, Longleng-i, School nung

infrastructure dak sendakba nung tetsükdaksü adokba indang lemsatep aser züngsemtem dang iba institution lenla ajak nung terenlok atema teyari agütsütsü mepeshia metetdaksü.

DC-i taoba senden indang minutes aser District Award atema tetettsüba committee indang lephishia benoka sensak asem aser ashiba agi, temsüa aliba ketdangsür, yimtsüng aser nisung 13 nem 75buba Independence Day amungba mapang district award agütsüba metetdaksü.

Transport, Employment aser

Home Guards amala department tem amenoktsü atema onüktem benoka sensak asem. House-isa, nüburtem timtem agintsütsü atema item ken o tem ya sorkar temelaba agitsü atema benoktsü telemtetba agi.

Maneni Kughalu Chishi, DPO, LRD-i, power point ajanga 2020 küm district nung Land Resources Department-i maparen balala benoka inyakba indang metetdaksü.

Kasa mapang nung PHED aser Water Resources department-i taruba senden nung parnok inyakyimtem metetdaksütsü.

Mejangjaba tasü mang ka nguteta lir

Dimapur, Rongjui/September 9 (TYO): September 9 nü Dimapur Hospital, Purana Bazar nungi mejangjaba tasü mang ka (tebur) mozüki-i bener aruba osang agütsü. Tasü mang dak sendakba nung ken o bushitsüngdang asü aser temulung melemi bilemba kecha mongtutet.

Asü sang teni tebang nungi poja adoka liasü aser pa dehydration agi asü asütsü ta bilemer. Ken o ajak

tebanga inyakba sülen tasü mang ya Dimapur Civil Hospital-i post-mortem examination atema benerogo.

Asüsanger kinunger aser medemertem dang East Police Station Dimapur Officer-in-Charge den tongteprateptsü mepeshia metetdaksüogo, ta Dy. Commissioner of Police (Crime) & PRO, Dimapur, Nagaland sangdong ka ajanga metetdaksü.

Security Forces-i Dimapur nung DNLA züngsem ka apu



Dimapur, Rongjui/Sept. 09 (TYO): Security Forces temi Police den lungjemer September 7, 2021 nü operation ka agiba mapang general area Naharbari Colony, Dimapur nungi Dimasa National Liberation Army (DNLA) züngsem ka pua liasü.

Osang tejangja ka nung

ajemdaker sepaitemi Assam Police den lungjemer operation agiba mapang, Assam nung kiralongraba mapa kar nung shilem agia alir DNLA züngsem ka ya pua liasü.

Pua alisang ya maneni asü ngdangyatsü asoshi East Police Station, Dimapur nung Assam Police nem amokja liasü.

Kiphire DPDB senden nung kaketshirtem nem tetushi agütsü

Dimapur, Rongjui/September 9 (TYO): Kiphire District Planning and Development Board senden September 8 nü DPDB conference hall, Kiphire nung MLA Pungro-Kiphire A/C, T. Yangseo Sangtam lenisüba nung menogo.

MLA-i lokti pelaa agizükba ojembiba mapang züngsem tasentem pelashishia agizüka liasü. Paisa, HOD ajak aser züngsem tasentem dang District ajangzüktsü atema bendanga agüja inyaksü ajungshi. Sangtam-i, lenla aika nung sentoka toktsüba ajanga Kiphire ya state kübok district tem rongnung atsüngzüka aliba district ka ama züngshir ta sasaseta ashiba den tang dang nungi talila inyaksü nüngdaker ta ashi.

Paisa, HOD tem dang tanga district tem den Kiphire-a jangyumedema atutsü atema pei khuret angateta abentsü mepeshi. Paisa, Kiphire District ajungkettsü atema parnok ajak longjemer inyaksü, ta ashi.

Kasa mapang nung iba senden nungsa temaba jenjang nung takok anguba

kaketshirtem aser DPDB züngsemtem rongnung senden nung tamakok maludaksü arua adanertem nem tetushi agütsü.

Tetushi agizükertem:

1. Saramati View Modern School, Kiphire nungi Cia Bose; HSLC nung Top 13.
2. Loyala Hr. Sec School Kiphire nungi Linkhianshe; HSSLC.
3. Social Welfare Department nungi Z. Tsangkhuchu.
4. Transport department nungi L. Meshu Khiam.
5. Daniel Zeliang, DPO & M/Secretary DPDB Kiphire.

Senden nungsa Kiusam EAC Hq nung GA. rest house ka yanglutsüba aser Jan Shikshan Sansthan Society, Kiphire züngoksemtsü atema onük benoka sensak asem. Maneni Medical department (National Tobacco control programme), Land Record & Survey aser Horticulture department temi PowerPoint presentation agütsü.

DC Kiphire, T.Wati Aier, NCS-i züngsem ajak dang sorkari agütsür aliba SOP sülen tashi anga anidaksü mepeshia liasü.



Mangkolemba Baptist Arogo nung Asso. Pastor A. Wati Longkumeri züluba "TSÜNGSARUSA" kaket ka September 9, 2021 nü Rev. Mar Longkumer, Pastor ajanga Arogo office nung meshiteta sarasademtsür sayatsü. Iba kaket ya tanü alima nung COVID-19 wara ajanga tanüla nunga aser alima lokti tentet ajak nung sadem-sadema meinyakteti TSÜNGSARUSA aliba mapang ka lir. Iba dak ajemdaker kaket züluri tongmelang agi sarasadema zülüogo, ta osang ka ajanga ashi.

ACKNOWLEDGEMENT



T. MEREN TZÜDIR

15.07.1962 - 04.09.2021

**"For the rest of our life,
we will search for moments full of you."**

Kinungbo aser tebu tajung ka iba alima nungi pilaa onok shisabulua mangyim tia nung alidang nenok temeimer shirnokisa ozü kibong den shisatsü, nubu aser sarasadem ajanga yariogo nenok ajak dang kanga pelar. Nenok mapa tajung onoki kodanga mamadoktsü.

**"Kechisarena nung tenüngsang agüjang.
Kechiyong nenok asoshi Khrista Yisu nung ya Tsüngremi mulungba lir."**

1 Tesalonika 5:18

~Loving Wife, Children and Relatives.



Assam: Majuli Apu November ita nungi yanglu tenzüktsü

Jorhat, Rongjui/September 9 (Agencies): Brahmaputra ayong nung Assam kübok Majuli aser Jorhat district na sendaktepba apu November ita nungi yanglu tenzüktsü.

Iba osang ya Assam chief minister Himanta Biswa Sarma-i Brehostibarnü metetdakja liasü.

Bodhbarnü Brahmaputra ayong nung Majuli-Nimatighat waterway nung rong tsüktepba lendong tulu atalokba sülen anogo ka lir Assam chief minister-i iba osang sangdonga liasü.

Iba lendong nung nisung ka asü aser nisung ana tang tashi mongui bushitepdar.

CM Sarma-i November ita nungi apu yanglu tenzüktsüba indang osang metetdakjaka apu design tang tashi

temelaba mongui lir.

"Centre-i design agizükba sülen November ita nungi apu yanglu tenzüktsü," ta CM Himanta Biswa Sarma-i ashi.

Maneni Assam CM-i ashiba agi, kilometer ti talang Majuli apu ya sen crore 925 intoka küm pezü tsüngda yanglutsü.

Temetetsükaji Majuli-Jorhat apu atema tang tashi nung nungshilong anabenbo azüngatokogo.

2016 Assam Assembly elections matong tsüngda union minister Nitin Gadkari-i Majuli ajanga Jorhat aser Lakhimpur na sendakteptsü atema apu ka asoshi nungshilong azüngtsü.

Küm pongu sülen kasa apu atema Ato Kilonser Narendra Modi-i 2021 küm

February ita Assam nung Assembly election matong tsüngda nungshilong azüngtsü.

Kasa mapang nung Assam sorkari state nung jurila rong mamshidaktsü atema tenokdangba agütsüogo.

Assam chief minister Himanta Biswa Sarma-i rong tsüktepba tesem semdangba mapang iba osang metetdaktsü.

"Tanü nungi tenzükta jurila rongtem senzütsü memelatsü kechiyong item rongtem nung marine engine mali," ta Assam CM Himanta Biswa Sarma-i ashi.

Ajisüaka pai jurila rong anshirtem atema maangka ka agüja parnok indang rong nung marine engine inoker amshitsü temelaba agütsüogo.

Aizawl nung herion bener lia nisung ana apu

Aizawl, Rongjui/September 9 (Agencies): Mizoram Excise and Narcotics department nungi ketdangsürtemi Bodhbarnü Aizawl kübok tesem ana meita aoba mapang sen lakh 2.8 alang heroin gram 112 ngutetogo aser iba dak sendakba nung nisung ana puogo.

Osang tejangja angazükba sülen ketdangsürtemi Bodhbarnü Aizawl kübok

Vaivakawn aser Hunthar na tsüngda tesem kar meita aoba mapang Chanmari West nung alir temesepba mozü ayoker B. Sangzuala (45) ket nungi heroin gram 26 pua liasü.

Ibala mesükba sentong ka ayongzükba agiba mapang excise ketdangsürtemi Mongolbarnü Aizawl kübok Chanmari tesem nung heroin gram 96 puogo.

Champhai district kübok New Hruaikawn yimtsüng

nung alir temesepba mozü ayoker Lalzarmawia (40), ket nungi iba temesepba mozü nguteta liasü.

Heroin jenjang ya shishilembadak sen lakh 2.8 alang asütsü, ta ketdangsürtemi metetdaktsü.

Iba ken o nung aija alisang ana ya Narcotic Drugs and Psychotropic Substances Act, 1985 kübok section tapet kübok aija puogo, ta kasa sangdong ajanga metetdaktsü.

Assam nung Rajya Sabha election October 4 nü agitsü

Guwahati, Rongjui/September 9 (Agencies): Election Commission (EC)-i Brehostibarnü sangdong ka ajanga Assam nungi menden ka densema Rajya Sabha menden tenet tazüng aliba atema election agitsüba anogo sangdongogo.

Election Commission sangdong ajanga ashiba agi, Tamil Nadu nung RS menden tazüng ana lir aser West Bengal, Assam, Maharashtra, Puducherry aser Madhya Pradesh nung menden kaka tazüng lir.

Menden tenet prongla atema October 4 nü election agitsü, ta EC-i metetdaktsü.

Assam nung Rajya Sabha menden ya assembly speaker Biswajit Daimary-i bener liasü, saka pai Parliament upper house nung mapa toktsüba aser pa züngoksema aliba taoba party

Bodoland People's Front nungi pilar BJP nung adenba sülen iba menden tazüng aküm.

BJP-i iba menden atema Union minister aser taoba CM Sarbananda Sonowal yoktsü imlar, kechiyong pa Parliament nung tang tashi züngsem ka mekümi lir.

EC sangdong ajangsa, election inyakyim nung COVID-19 dak sendakba tetuyuba sülen anidaktsü tetuyuba agütsüogo, koba osang sangdongba anogo nungi vote azüngba anogo tashi benoka inyaktsü, ta ashi.

"Item state tem nungi chief secretary tem dang, election agitsü atema renemtepba mapang COVID-19 tashidak prokshia aoba nokdangtsü atema inyakyim anepalutsü asoshi state nungi ketdangsür tejen ka nem nongloktsütsü metetdaktsü," ta Election Commission-isa ashi.

Tripura: BJP züngsemtemi newspaper office ka raksatsü



Bodhbarnü Tripura BJP worker temi Agartala nung newspaper office ka raksatsü dang kima nung aliba garitem rondoktsüba yangi noksa nung angur.

Agartala, Rongjui/September 9 (Agencies): Bodhbarnü Tripura BJP worker temi Agartala nung amenoker aliba newspaper office ka amakba sülen osang bener pezü yirutsü aser iba den gari, computer aser osettsüt balala raksaja liasü.

BJP züngsemtemi local daily "Pratibadi Kalam" office raksatsü aser office kima anena yua aliba gari aika rongtokja liasü.

Iba osang kaket yimozülur Anal Roy Chowdhury-i ashiba agi, BJP rally ka agiba sülen ruling party züngsemtemi pa indang office amak, aser office kima anena aliba gari aser two-wheelers tem rongtoktsü.

"Iba lendong nung osangbener pezü yiruogo. Paper ajak, kuli kakettek, computer aser CCTV camera tem ajak raksatsüogo saka iba tesem nung aliba police temi ola madoki repranga ata," ta Chowdhury-i ashi.

Paisa, item nisungtem yagi

sung aser hadir techira bener liasü, ta ashi.

"Osangbener Prasenjit Saha dak tesülen nungi tekolak nung hadir techira kati züklokja kanga mejungi yirutsüogo," ta pai ashi.

C h o w d h u r y - i osangbenertem dang ashiba agi, taoba mapang Tripura nung iba amai lendong tulu adoka media office amakba ajangshidanga mali.

Media loktitentet aser Agartala Press Club Secretary Pranab Sarkar densema osangbener tejentem aikati iba newspaper office semdangogo aser iba tatalokba khokhoa aitsüba den office amakertem tangsa tang aputsü atema takhangba agütsüogo.

"Police-i iba office amakertem ghonda 12 tsüngda mepura onoki ochi obendang angutsü atema longkak aitba sentong ka ayongzüktsü. Office amakertemi raksatsüba osettsüt atema sorkari temenok agütsütsüla," ta Sarkar-i ashi.



TIR YIMYIM YIMOBILEM (EDITORIAL)

DIMAPUR ROGONÜ, RONGJUI (SEPTEMBER) 10, 2021

Ajem agiba tetka maka

Tanü putu ya akhi putu ama masü, tzü mopong kenyongi melenshiogo, anungji tashidak tasen tasen pokteter aser ano poktetyonga aotsü. Tashidak tasen poktetba kuli aika lir aser aika rongnung tongtibang kuli ana lir, kaji alima nung nisungtemi inyakba mapatem light tsüklokba nungi shir asenoki agiba süoshi aser osettsüset gari tashi ya industry nung yin agi mi kuma tatsük adokdakja yanglur aser ano alima ajaklen amang sangwa maka gari jajar. Item jagi alima tsükdaktsür aser tzü mopong menentsür. Ano kaji, alima meimchirtem asoshi tetsübuttsü aser shisabolutsükaji, joko tanü putu nungbo gari aser tayimtsü amshia injang bomb agi kin o kin na raraba yagibo temulung masü aser temulung malem, mopong nung miim tango aser tashidak mesen yoktsü sentong yangluteper. Tetezü, tanübo joko tashidak ya tzü mopong menenba kija agi masü saka nisungia yanglur. Aji oda, tanü asenok kangshiba Corona virus (tashidak) ya China lima Wuhan yimti nung Wuhan Institute of Virology nung China nungertemi alima tongpang rara nung amshitsü atema yangluba tashidak wara mesen ka lir ta tangar alima kintemibo temulung meleme bilemer. Atangji, ibaji shitaka ta tang tashibo tejangja kuli nguteta mali, saka alima kintemi tangar tsükchir kin anema raratsü asoshi injang bomb melena tashidak mesen yangluba putuji tanü lir. Iba ama putu ka nung, koba tashidak atema südir süaka, mozü yanglur tashitemetettertemi tashidak wara nokdangtsü asoshi ngutetba mozü nungji asenoki temulung alemtsüla. Atangji, mozü dang masü saka chiyongtsüa dena tasen adok dangbo nisung aikati metendangi odang agizüka achitsübo ratar. Aji nisunger yimya aser kümdangbaji junger. Ajisüaka, kodang alima nung tanü ama meimlaika tashidak tasen poktetdir, tashidak aser mozü indang shisa bushirtemi amu moi tashidak aser mozü indang shisadanger aser tashidakji nokdangtsü aser aneptsü asoshi mozü yanglutsü atema parnok mapa inyakdak shisa tasen bushiloka shiruru dak aser nisung dak tendangpet tendangba sülenang, nübortem nem mozüji agütsütsü atema yimteni temelaba agütsür. Iba amaji tashidak tongpang teraradak nung scientist-temi Covid-19 tashidak nokdangtsü atema mozü ngutetogo. Ajisüaka, nisung aikati iba mozü dak kanga temulung meleme jembir. Aji oda, kari tamangba yimsü tsütsü aser karibo alima nung nütsüng ajemdaktsütsü atema adokba mozü ta olulu tapu aika adoka jembir. Kechikomaka, mozü dak temulung meleme jembidir jembiang, tashidakbo asenok den lir, anungji iba den raratsü asoshi mozü kanga rongdaka nungdaker. Karibo mozü tasen ka tendanga yanglutsüba kum asembo mesüra trokbo agitsüla ta ashir, ajia shitak asütsüa akok, saka kum asem atadangi asenok ajak tashidak ya metizükteite süadokra koda? Itemji bilemdanga, asenok tia ajung scientist-temi kanga karaa Covid-19 mozü ya ngutetogo ta angatetdi. Atangji, tang Covid-19 mozü nguteta aliba ya agira kenyongi Covid tashidak agi matongtsü ta masü saka Covid-19 tashidak agi shirangyonga, Covid-19 mozü khen danga agir lira, melamelaa aneper aser aneper külena iba tashidak jagi kodamasütsüa mekangshir. Ibayongji, King George's Medical University (KGMU) nung inyaker doctor 56 dak ita pungo-trok tsüngda Covid-19 tashidak agi anaben tashi atongertem temang tendangba nung putetba agi, Covid ajem ya khen agia alirtem asoshia teyari tulu angur, Item doctor 56 rongnung doctor 16 bo Covid jem khen dang agir liasü saka parnok dakji Covid-19 mesen aliba putetaka teshiranga meshirang aser kar trok shia, aketa aser temang tera metaa shirangyonga anogo asem pezü tsüngda junga adok. Atangji, Covid-19 ajem agiba ajanga shirangba otsüa lir saka melamelaa jungadoker. Aji oda, scientist-temi jungjunga tendanger agütsüba mozü, tamasa doctor-temi agir külenang asenok nem agütsüba mozü dak asenoki temulung meleme, ibajibo tsüraburi soruchiok agütsüba chiyongtsü nung miim enoker agütsü ama temulung meleme bilemba den kasa asütsü.

OLEMSABANG

Tanü Mobile Addiction Lokti nung Tebilemstsü

~ Jungshimanen (Osang zülur)

Okila

'Reading for Pleasure' ta ser chapter ka high school nung azüngba bilemteter. Kaket azüngtsüji kanga tongtipang saka ano tamajung zünga lira ajibo tezüng ta tanur dang ashitsüji nungdaker. Saka, koba 'teinyak, nung' ta shidir ajiang tali inyaker ta lesson nungji ashi. - *Shilula Imchen*

Covid wara sülen (Post-Covid context) nung teinyaktsü tebilemstsü aika YSS nung jembia arudagi. Item rongnung kaji electronic addiction ya asütsü. Lanurtem medemer den sensaksema, asayatepa (socialization) kazütsü sadema mali, saka anogo piyong mobile phone dang amer kazür. Karbo anogo nung ghonda 5-6 (talia asütsü akok) tashi entoker. Video games asayadang aonung memejanger, chi-a mapang shitak nung mechuyonger anungji temang nung timtem balala (health issue) aika adokba lir. Kinunger aser medemer rongnung sensaksem ajema kumogo. Online class atema kangshitepa smart phone alir class agiba ajanga tila tanura anojungi mobile addict kumogo. Iba ya tebilemstsü tulu lir. China, Japan nung mapang ka video games ban asü aser de-addiction centre aika lapoka ao. Drugs aser yi detox indang jembir, saka mobile de-addiction ministry yaa nungdaksü mapang tonggogo. Mobile phone ajanga games asayaba aser porn repringba ya drug addiction den kasa ta clinically ashir. Iba tebilemstsü indang Yanglushidi Sensaksem Sabang (YSS) nung jemi aser ano tali shisadangtsü asoshi yangi tongmelang agi tebilemba kar lemsateper.

Addiction angatetshiba

Smartphone maten mapa kechia meinyaktsütsü puti kati aruogo. Class room nungi tenzüker assignments, project works, shopping, relationships ajak smart phone ajanga inyakba putu. Kasaji tain rongnunga item technology aser media ya taküm leman nung tiyongtsü aser taküm yimya (center of life/way of life) kümdaktsüogo. - Zülu Jamir

Inyaksangshi, yimya mesüra chiyungtsü ka dak dang metaloker aliba. Tekolok aser shi temang nung timtem agüjaka pei sasa yimya ka mazüoktetba mesüra chiyungtsü mazüokteti achiba aser item dak dang nendaka metaloker aliba dangji addict ta ajar.

Drugs ajanga tanur tajung aika samaogo aser samadagi, drugs dang nungi tamajungba nisung tekolok, taküm raksadaksüba smartphone ya ka asütsü aser ibai alima ajanga tebilemstsü ka lir. Anungji, koba agi nisung ka temang, tekolok, tanela aser yimayimpong ajak melenshidakja, joko ibai meteni taküm meliteter aser timtem takoksa tulu agütsür iba dangji addiction ta ajatsü akok. Iba tashitaki asen lima menebogo aser Covid sülen iba kumo tuluba kumogo.

Asen Tendak Mobile Addiction

Mobile phone/gadgets addiction ya lokti nung kanga kanga tebilemstsü kümadokogo, asen lima nunga mapang talangka melii, de-addiction centre/mobile, rehab center nungdaksü. Tila tanur aser students dang masü, kijung lanurtema nungdaksü. Kibong sensak tiai aiba, mangatetep aser rara jenti mobile addiction ajanga bener arutsütsü. Mobile lar mekümi asenok jemboa alitsü aji ajaki aroka bilemstsüla. -

Achila

Tanü media ajanga osangtsüsang tesüngmangtsüka prokshiba (media saturated) tensa ka nung asenok alir. Shisaluyimer asoshi class room nungi tenzüker assignments, project works, shopping yamala ajak smart phone ajanga dang inyaker. Kasaji tain rongnunga item technology aser media ya taküm leman nung tiyongtsü aser taküm yimya kümdaktsüogo. Pandemic lockdown mapang "time-pass" Smart phone amshidang tanurtem dang masü taintema aika addict kumogo. Ya tebilemstsü tulu lir! Apuani tsüngda sensaksemstsü mapang mongui kumogo. Pastor-tema aika Lai bushiba nung masü mobile phone amshiba nungang mapang talangba entoka alitsü südi. Itemji khen bilemdanga tanurtem dang masü saka tain-a pei sasa azüoktsü junger.

Iba addiction ya tsürabur shirnok kiyim-lanu lir parnok nungi tenzükdaktsütsü leman aika lir. Kechiaser tila tanur kum ka majungdang nungi video temloka yutsür mapa khen danga inyaktsü merangba aser chi-chiyungdang mobile tsüloka yutsüba ajanga Smartphone-ji surrogate parents kümdaktsüogo! Kinü asüadang nungi iba yimya süpadaktsür, table manners samar aser addict kümdaktsür.

Tanü repringdanga, apps tapu balala - Facebook, YouTube, Instagram, TikTok, WhatsApp, aser video games yamala online app-tem ya ka khen ka khen ta lapoka amshidang anogo süitemdaktsür. Internet recharge süa amshiba nung sen jenti entoker. Tongtipangsa, online games asayadang sen lakh tema laluba angur.

Mobile Addiction Metetyim

Kodasür pa/la ya mobile addict kumogo ta metettsü - anogo nung ghonda aika mobile amshiba nung mapang entoktsü. Tat. agi, anepdang sakli aser aonung temejangi mobile repringtsü, chi-chiyungdang aser metsü-meshidang (toilet nung) ajak nung amshitsü, teka nung mobile teti amer dang alitsü, yimdong nung jajadang lenmanng masü mobile dang repringa jajatsü, medemer aser kinunger den kazüadang mobile dang amshitsü, tenla kidang tekülem mapang nunga mobile repringa dang alitsü. Mobile melira pa/la takümji mabensa ama bilemstsü aser melitettsü. Joko mobile dak metaloker (depend) dang alitsü. Tekolok amshia mapa inyaktsü aliba ajak mobile nem dang inyakdaktsütsü, tat. agi calculator; aser temulung nung ayutsü nungdakba ajak mobile nem dang yudaktsütsü - memorize masütsü.

Arogo Teinyaktsü

Tanurtem dang mobile tamshi ta amokmerena masü saka mobile amshitsü melena mapa ka agütsütsüla. - *Shilula Imchen*

Tang tashi nung arogo iba tebilemstsü anepaluba nung shilem kangabo magir. Arogo nungi tenzüker schools aser lokti ajanga nung media education ya peria agütsütsüla. Kechi addiction südir süaka iba ajanga koda taküm ka raksatsür (ill effect sensitize) aji tuteta sayutsü kanga tongtipang aser iba dak metaloker aliba tejangraba (carving desensitize) anendaktsütsü merangtsüla. Yimdong nung signboard, flex, billboard nung item awareness zülur yutsü nung iba jagi terabo yaritsü ta bilemer.

Jembiba aser tebilemba ashiba (theory) agi dangbo addiction nungi jenbuttsü tamakoktsü. Anungji, iba tongpang tebilemstsü akoktsü asoshi Arogoi item mapa ya inyakdaktsü nung koda? (i) Tenla ki rong atepba, (ii) Arogo kisü-jensü mapa, (iii) Kibok-kisem nung anir jajaba, (iv) Electrification, (v) Sound System amshidaksüba, (vi) Coffee shop lapokba, (vii) Ola-angla mapa balala sayuba, (viii) Chiyungtsü balala yangluba (ix) Aben-süoshi, painting balala mapa, yamala aika inyaktsü akok. Parnok akok tashi socialize südaktsütsüla. Arogo ka nungbo, tesem tezü ka nung merongteper PUBG aser Mobile Legend tournament asayatepa alirtem to, mobile repringtsü mapang mongui joko ita junga mapa nung nokdaker de-addiction asüba kuli lir. Anungji, rongsen ao mesasai Arogoi item mobile addict-tem ya anepalutsüla.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger agateta agitsü mepishir



Mexico nung tanur raksaa indoktsü melaba anema Khristantemi court kima sarasademba noksa nung angur. Mongolbarnü Mexico nung Supreme Court-i, tanur raksaa indokertem nem temerenshi agütsütsüji ozüng alema lir, ta obendang agüja liasü.

India nunger Khristan putir ana Afghanistan nungi anir aruogo

September 09, 2021: Missionaries of Charity nungi nun pezü aser Jesuit putir ana Afghanistan nungi India tonga anir aruogo.

Kolkata nung Mother Teresa-i tenzükba Missionaries of Charity-i nun tem atema maneni sarasademtsüba atema nübürtem dang pelaba lemsatöp.

Nun pezü nungjagi kabo India tsür lir. 2004 kum Missionaries of Charity-i Afghanistan nung mission mapa tenzükba liasü.

Osangbener den jembidang Kolkata nung Sister Christy-i, "Nun pezü Afghanistan nungi anitetogo aser parnok ajak kumzükba lir. Iba ama tensa ka nung onok atema sarasademja arur ajak dang pelar," ta metetdaksü.

Ano külen Jesuits putir kati

sangdong ka ajanga, ozü putirtem Afghanistan nungi aniteta India tonga anir aruogo. Parnok quarantine süogo aser tang anisüngzükdar, ta metetdaksü.

Tamalen osang ka ajanga, August 25 nü nun pezü denji parnoki anepalua aliba tanur 14 densema nisung 277 tayimtsü ana nung Rome-i anir ogo, ta metetdakja liasü.

"Tanurtemji arrshi kum 6 nungi 20 tsüngdapurtem lir. Tanur ajakji 2006 kum Kabul nung Missionaries of Charity-i lapokba orphanage ka nung liasü, ajisüaka Taliban teloki iba yimti agiba sülen tangbo iba orphanage ji shibangogo," ta kasa osang ajanga metetdaksü.

Afghanistan nungi anir aruba Jesuit putir anaji Afghanistan nung Jesuit mission

nung tongti, Jerome Sequeira aser pa indang assistant, Robert Rodrigues na lir.

Afghanistan nung shisaliok ajanga linük yangershiba nung yaritsü atema 2004 kum Jesuits putirtem Afghanistan-i oa liasü. Jesuits teloki tesayur 300 dak tema nem training agütsüogo aser tesayurtem jagi province pezü nung tanur 25,000 dak tema nem shisaliok agütsüogo.

Jesuit mission ajanga tetsür tanurtem taliba tajangzük nguogo.

2002 kum May ita nung Pope John Paul II-i Afghanistan atema mission mapa tenzükba liasü.

August 16 nü Taliban teloki Afghanistan linük agiba sülen India nungi Jesuits teloki Afghanistan nung parnok mission mapa anena liasü.

Turkey sorkari Protestant Khristantem anema inyaker: WEA

September 09, 2021: World Evangelical Alliance (WEA) teloki Turkey nung aliba Khristantem nem tamangba yimsü dak sendakba temeden junga magütsüba aser Protestant Khristantem nokdangba indang report ka United Nations Human Rights Committee (UNHRC) nem agütsüogo, ta International Christian Concern-i metetdaksü.

Tesüiba kumtem nunga WEA-i UNHRC nem kasa report agüja liasü. Turkey nung Khristantem nem temeden junga magütsüba nung ajemdaker Turkey sorkar ajungmesotsü atema parnoki UNHRC nem kasa report agüja arudar.

Yaküm-a International Christian Concern-i Turkey linüki Khristantem aruba nokdangba densema religious freedom anema inyakba report ka agüja liasü.

"Ministry of Interior-i Turkish Intelligence (M?T) den

senteper bendanger Khristantem mindoktsü atema telemtetba agiogo. N-82 code kübok bendangertemi Turkey telungi aittsü atema jelia temelaba meshitsüla. Ajisüaka temelega meshiba inyakimji kodanga benshia maru. Iba ya linük telungi aitba nokdangtsü atema lir. Iba ama tensa ka nung court nung ken o benoka iba code magien tashibo bendanger kati linük telungi meitetsü," ta ICC-i metetdaksü.

Turkey ya democratic aser secular linük ka lir saka tanü tashi sorkari Turkey nung aliba Protestant Khristantem anema inyaker, ta WEA report nung shia lir.

N-82 code benokba sülen Khristantemi legal tsütsü timtem ajangshia arur. Iba dak alia court temia N-82 code agientsü atema memelunger, ibaji ajanga Turkey nung Khristantemi tanaben iba linüki aotsü atema legal document meshitsüsa akümer. Tamalen WEA report nung ajemdaker

UNHRC-i Turkey sorkar ketdangsertem dang Turkey nung masüba Protestant Khristan lenirtem arutsü memelaba mesüra linük nungi meyipa yokba anentsü metetdakja liasü.

Akhidang nungi Turkey arrtsülen Khristan yimsü liasü anungji Khristantem dak melung malemba kecha mali, ajisüaka Protestant yabo bendanglen tenzük, ta shia sorkari bendanger Protestant tem dak melung malemer.

Aso 19buba nung Turkey nung shisaliok aser medical sectors ajanga Protestant nütsüng kanga aren, ibayongji tangbo mission mapa inyakertem apuba sülen linük nungi mindoker.

Iba dak alia Turkey sorkari bendangertemi mission mapa inyakba ya linük security atema amokmeren ta züngshia bendanger Protestant Khristantem linük nungi meyipa yoktsü nükjdong nung N-82 Code ozüng ya benok.

ANO GO ABEN TSÜNGREM DEN

Meshitetsü aser yok

Ochi nung parnok meshitetjang: Ne O ochi lir. Nai kechi koda alimai ni yok, yamaji Nia parnok alimai yoker. Yohan 17:17-18.

Tsüngremi teti na meyokdang tama meshitetsür. Tebui nütsüng tera ana shimtet aser temeshi ochi, Pa jabaso ajanga meshitetsü. Parnok Yisu den sendaktepa ali nung ochi agi (Yn. 14:6) nütsüngtemi ochi ajanga aser osangtajung sayutsüngitsü asoshi renemtsü. Yisui parnok tejangraba jazük (challenge) (Luke 9:46-48), parnok tamang ilaba indang ashi (Matt. 17:19-20), Satan arutsü (Matt. 16:23), aser parnok asükümba aitsü (Matt. 26:33-35). Kodang Yisui parnok renemtsüba atema alimaji aki ama malitsü saka melenshidaktsütsü ain agütsür Pai parnok alimai yok. Temeneni Tsüngrem tsüngdang na tamakitsü kümdaktsür ta Satani puatsü akok. Tiyazü tulu nungi ibaji tiyazü aruba asütsü. Nai temenen menali Tashioktsübai "Nai tamakok nguogo. Na tang joko Tsüngrem tsüngdang takidak maka" ta ashitsü. Iba yagi Khristan ka dangi tamakokji tali shisanga aser tali teyimla makaba kümdaktsütsü. Aji saka, Tsüngrem tanela ka nüji kümdaktsüba kecha dena medemdangtsü makok. Kodang Tsüngremer nüburi Tsüngremer ochibaji Tsüngrem mulungba nung ayutsü mulungtetdir, idangji Tsüngrem ainji mezüng nütsüngtem nem agütsüba ama parnok ajanga kasa yoktsü.

Ochibai na nüji kümdaktsütsü. Ochiji "Asenoki asen temenen nangzükra, asenok dang asen temenen adoktsü aser memeshiba ajak nungi asenok merükdaktsütsü, Pa temulung lemtetba aser ochi lir" (1 Yn. 1:9), aser asenok Tsüngrem asoshi alitsü agizüker.

Afghan nunger Khristantem atema timtem tali bendenloker

September 09, 2021: Taliban ibi linük nung Khristantem atema mission mapa tenzükba liasü.

Taliban yimsüsüba kübok Afghanistan nung ano tamajungba reshikangshitsü, ta Mission News Network (MNN)-i metetdaksü.

"Taliban yimsüsüba metenzükdanga Khristantem kanga timtema liasü. Khristantemi parnok kibong züngsemtem danga pei yimsü mimshir, kechiyong kinüngertemi parnok sendoktsü mesüra tepsettsü. Tang Taliban yimsüsüba lir, anungji Khristantemi reshikangshi tamajungba ajurutsü," ta Open Doors field director for Asia-i metetdaksü.

Square One World Media nung executive director, Shoaib Ebadi-i, Afghan nung Khristantem aikati pei yimsü mimshiyonga parnok kinüngertemi ibaji jungkai adoktsür, ta metetdaksü.

Afghan nung Khristantem atema mezüngbuba tsükchirji kinüngertem lir, kechiyong kinüngertemi parnokia Islam yimsü toktsür Khristan yimsü agizüktsüsa akümtsü ta bilemer, ta paisa metetdaksü.

Shoaib Ebadi-i, Afghanistan nung Khristantem atema osangtajunga lir, ta metetdaksü.

"Osang tajung kaji- tang teloki Afghanistan agiba sülen Afghan nung Khristantemi kidang adenshia tekülem timtem taliba bendenlokogo, ta Khristan temeden atema inyakertemi metetdaksü. Taliban yimsüsüba kübok Afghanistan nung ano tamajungba reshikangshitsü, ta Mission News Network (MNN)-i metetdaksü.

US sepaitemi Afghanistan toktsür aoba sülen Taliban teloki iba linük agiba nung ajemdaker linük nung aliba underground Arogo lenirtemi Khristantem dang kanga kümdanga alitsü metetdakja liasü.

Afghanistan nung underground Arogo ka nung pastor aser melungtet telok Global Catalytic Ministries tentetsangi melungtet telok ka nem Afghanistan tensa osang tejangja metetdakja liasü.

Pastor jagi sangdong ka ajanga, "Taliban teloki meteta aliba Khristantem tepsettsü atema tenüng züludena lir aser parnoki Khristantem tepsettsü atema bushir. US Embassy shibangogo anungji Khristantem jenoktsü atema tesem kecha mali," ta metetdakja liasü.

"Taliban teloki ki shia mita oa tetsür aser tanurtem pudener. Arrshi kum 25 dak tema tetsür ka kidangji ngura la kinüngbuji tepsettsü aser parnok inyaknüttsü inyakba sülen alar ama yokadoktsü," ta pastor-isa metetdaksü.

OLONG PAITEP # 5932

1			2					3		
4							5			
						6				
				7						8
		9								
							10			
11							12			
13										

TIPILEN		LANGTSÜNGLEN	
2. Teka mapa tajung	- (8)	1. Anepalua inyak	- (7)
4. Anakshinüba	- (5)	2. Teptsü	- (4)
5. Süoshi agi tazü	- (4)	3. Nok agi raratep	- (6)
9. Aria bilemtep	- (7)	6. Kibong aküm	- (4)
11. Ajemalu ozü	- (4)	7. Nüji masü	- (4)
12. Tzü an	- (5)	8. Taruba küm	- (7)
13. Teben teloktep	- (8)	9. Teka shidok	- (6)
		10. Meputep/Mapet	- (4)

OLONG PAITEP # 5931 TELANGZÜBA

TIPILEN :	LANGTSÜNGLEN :
1. Yimlibilem, 4. Anak, 5. Tangar,	1. Yongya, 2. Moko, 3. Marok,
7. Aya, 8. Arong, 11. Par, 13. Lemjem,	5. Teronem, 6. Nung, 8. Amajok,
14. Oagi, 15. Mulung.	9. Jangzü, 10. belem, 12. Rong.



ALOKBAR KIBONG TIA :

Alokba : (Hotel room nungi phone nung).Hello, managerba, ni room no.405 nungi jembir ako, khen asema atungma.

Manager : Kwa sir, kechi asü?

Alokba : Ozü tantsüya küna ayipba room window nungi pongzüka asüja ahar aja, kü dak molung malemera ta.

Manager : Sir ajibo nür kibong kija khuretji to, onok kecha shilem maliato.

Alokba : Hauja, saka iba room window ya nia kanga meranger sürnung melapokteter aja, taji la temolung memeyipdang Phu ka tangsa bener asemang, window ya akhopokjar.

Manager : Oh.Alokba!

Lilir : WhatsApp

TANÜBO NAI LANGZÜANG

Q. Centre for Development of Telematics indang headquartera kong lir?

- A.New Delhi B.Mumbai C.Pune D.Bangalore

(Taruba adok nung onoki langzüsü)

YASHI ADOK TELANGZÜBA : Chhattisgarh

AO OSHI ANGAZÜKDAK:

TANÜ ANGAZÜKTSÜBA OJANG



Tir Yimyim

Külem

(adj) arok,ajak (collective)

* Yimti yimdong merüka ayutsüba ya külem mapa lir.

Külem

(v) Tsüngrem akümtsüba tushiba aser sarasademba (worship)

* Tenla ki ya Tsüngrem **külemba** ki lir .

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Tepela Tasoba Anogo

1. Tenüng :
 2. Tasoba anogo:
 3. Küm : 4. Class :
 5. School :
 6. Talidak :
 7. Salem osang :

NAI-A YA METETTER MA?

AUGUST 21' NUNG SAYABA KENSEP TASEN KAR:

- | | |
|---|---|
| - Late Night Savior - From Ruins | - Lil Yachty - Birthday Mix 6 |
| - Black Birdie - DEAR DIARY | - Slimesito - Rich Slime (Deluxe) |
| - Kanye West - Donda | - Stray Kids - NOEASY |
| - Lil Wop - Say Cheese | - Switchfoot - interrobang |
| - Wizkid - Made In Lagos (Deluxe) | - The Joy Formidable - Into the Blue |
| - Belly - See You Next Wednesday | - Dream Theater - Lost Not Forgotten |
| - Bethany Barnard - All My Questions | Archives: Train of Thought |
| - Big Red Machine - How Long Do You Think | Instrumental Demos (2003) |
| - Gorillaz - Meanwhile - EP - 3/3 | - Red Velvet - Queendom |
| - JAY B - SOLO:FUME | - The Killers - Pressure Machine |
| - María Becerra - Animal | - Trash Boat - Don't You Feel Amazing? |
| - Ray Vaughn - Peer Pressure | - Trisha Yearwood - Every Girl (Deluxe) |

SUDOKU # 5973

TELANGZUBA # 5972

	9	3	7	6				2	6	3	4	5	1	9	8	7	
							1	8	1	9	2	6	7	5	4	3	
5		8	3	9	1			7	4	5	9	8	3	2	6	1	
3	1			2			5	5	2	4	7	1	6	3	9	8	
8	6		5	3				1	3	7	8	4	9	6	2	5	
	5					8	3	9	8	6	5	3	2	7	1	4	
9	3	5		1	7		6	2	3	7	2	1	9	4	8	5	6
		4					8		6	5	1	3	2	8	4	7	9
			4	6				7	4	9	8	6	7	5	1	3	2

OJANG LUTEP # 5518

- AIN :
- NGDA :
- NSHMELEIA :
- UNTAJG :
- AKTSÜMÜ :
- UNMOLGRA :
- JIIBA :
- INTSYAKÜ :
- NUMEA :
- LMAI :

OJANG LUTEP TELANGZÜBA # 5517

NAIBO TAJUNG BILEMA JEMPIONGA LOKTII
 HAU MASÜ NUNGBO TAKOKSA ULURA

TAN HOPTA ATEMA - KOMA SÜLA ?

Q. Nagaland angh R.N. Ravi ya melen nunga koma süla ?

EC-i Rajya Sabha menden 6 atema election anogo sangdong

New Delhi, September 09 (Agencies): Brihostibarnü Election Commission (EC)-i state pongu nung Rajya Sabha menden trok atema October 4 nü by election agitsü atema anogo sangdongogo; item menden ya MP temi anenba mesüra süadokba ajanga tazüing aküm.

Iba dak alia Puducherry nunga October 4 nüsa RS menden ka atema election agitsü.

Rajya Sabha nung menden trok atema election agitsü aliba state temji Tamil Nadu (menden ana), West Bengal, Assam, Maharashtra aser Madhya Pradesh state tem lir.

Tamil Nadu nungi MP ana- K P Manusamy aser R Vaithilingam na anenba ajanga menden tazüing aküm; West Bengal, Assam aser Madhya Pradesh state tem nungi Manas Ranjan Bhunia, Biswajit Daimary aser Thaawarchand Gehlot nunger anenba ajanga menden tazüing aküm aser Maharashtra nungbo MP, Rajeev Shankarrao Satav taküm May ita nung asüba ajanga menden tazüing aküm, ta ketdangsertemi metetdaksü.

Ano Puducherry nungi MP, N Gokulakrishnan kümsük October 6 nü tembangsü aliba

agi iba menden atema election agitsü. EC-isa Bihar nung legislative council menden ka atema election October 4 nü election agitsü sangdongogo. MLC, Tanveer Akhtar taküm May 5 asüba ajanga iba menden tazüing aküm.

EC-i, tang coronavirus wara aliba nung ajemdaker wara anema tenokdangba balala shidak benschitsü, ta metetdaksü.

EC-i election agitsü aliba state tem nung chief secretaries dang wara dak sendakba tenokdangba balala benoktsü atema tongti ketdangser ka nem mapa lemezükjang, ta tuyuogo.

RSS den sendaka aliba BMS-i totzü jenjang atuba anema longkak ait

Nagpur/New Delhi, September 09 (Agencies): Linük nung gari totzü jenjang maneni atuba aser osettsüset nung jenjang kanga atuba anema Brihostibarnü Nagpur nung RSS den sendaktepa aliba labour union Bharatiya Mazdoor Sangh (BMS)-i longkak aitogo.

BMS nung inyaker temi Nagpur yimti nung aliba Samvidhan Square nung longkak aitba sentong ayongzuka agiogo.

BMS all-India secretary, Ravindra Himte-i, "Industry mapa ajema akümer, mapa manguba tebilemtsü tuluba akümer aser osettsüset nung jenjang kanga atur. Talisa coronavirus wara aliba ajanga sensakertem mejungi kongshir,"

ta metetdaksü. Paise, linük nung petrol, diesel aser LPG cylinders jenjang kanga atuba ya tebilemtsü onük tuluka kümogo, ta metetdaksü.

Petroleum products ya Goods & Services Tax (GST) küboki aiddaktsüsüla, aser tang anogo shia jenjang seplasepshiba inyakyim ya anenadoktsüla, ta pai takhangba agütsü.

BMS lenirisa, Centre aser Maharashtra sorkar nati petroleum products nung agiba saru ya ajemadoktsüla, ta takhangba agütsü.

"Sorkari osettsüset jenjang atuba ya ajemtsü atema kecha meinyakra BMS-i district shia nung longkak tesashiba aittsü," ta pai metetdaksü.

NIRF temaba jenjang nung IIT Madras aser IISc Bengaluru na shim

New Delhi, September 09 (Agencies): Brihostibarnü Ministry of Education-i National Institutional Ranking Framework (NIRF) 2021 sangdongogo; Indian Institute of Technology (IIT) Madras-i temaba jenjang angu aser tang agi küm asemubaba IIT-Madras-i iba ranking temaba jenjang angur, ta ketdangsertemi metetdaksü.

IIT-Madras-i 2019 küm nunga score 83.88 angu aser 2020 küm nunga score 85.31 nguteta liasü.

NIRF 2021 ranking tanabuba jenjang Indian Institute of Science (IISc), Bengaluru-i angu aser tasembuba jenjang IIT Bombay-i angu.

Iba ranking temaba jenjang 10 rongnung IIT Delhi, IIT

Kanpur, IIT Kharagpur, Roorkee aser Guwahti, Jawaharlal Nehru University aser Banaras Hindu University densema lir.


6buba NIRF Ranking ya Brihostibarnü Union Education Minister, Dharmendra Pradhan-i sangdong. Iba ranking ya category 10 nung yanglu aser itemji; Overall ranking, University, Management, College, Pharmacy, Medical, Engineering, Architecture, ARIIA (Atal Ranking of Institutions on Innovation Achievements), Research & Law lir.

India linük nung Engineering college temaba jenjang 10 anguba colleges ji IIT Delhi, IIT Bombay, IIT Kanpur, IIT Kharagpur, IIT Roorkee, IIT Guwahati, IIT Hyderabad, NIT

Tiruchirappalli aser NIT Surathkal lir.

Indian Institute of Management (IIM) Ahmedabad-i best B-School jenjang angu aser Jamia Hamdard-i top pharmacy studies institution jenjang angu.

Colleges category nung Delhi nung aliba Miranda House-i temaba jenjang angu iba sülen tanabuba aser tasembuba jenjang anguba college anaji Lady Sri Ram College for Women, Delhi aser Loyola College, Chennai na lir. NIRF ranking nung AIIMS Delhi-i top medical colleges jenjang angu aser tanabuba aser tasembuba jenjang angurtemji PGIMER Chandigarh aser Christian Medical College, Vellore na lir.



September 09, 2021 nü New Delhi nung linük Tir, Ram Nath Kovind-i Union Home Minister, Amit Shah ket nungi Parliamentary Committee on Official Language report meshizükba noksa nung angur.

India nung coronavirus wave tanabuba ano metembang: Centre

New Delhi, September 09 (Agencies): Brihostibarnü osangbenertem den jembidang Centre sorkari, linük nung tang tashi coronavirus wave tanabuba lir, ta metetdaksü.

Coronavirus wave tanabuba ano metembang aser tang tashi ano district aika nung coronavirus kanga puteter, ta sorkarisa metetdaksü.

"India nung district 35 nungbo hopta shia coronavirus positive putetba shilemji 10 dak tema lir. Iba dak alia district 30 nung hopta shia coronavirus positive putetba shilemji 5-10 tsüingda lir," ta Centre-i metetdaksü.

Taoba hopta India nung coronavirus tashidak putetertemji shilem 68.59 bo Kerala state nungi liasü, ta sorkar ketdangser kati metetdaksü.

ICMR nungi Dr Balram Bhargava-i nüburtem dang taruba benjungmong mongpu nung benjungtepdang nisung kangabo longsolongben masütsü metetdaksü.

"Wara prokba nokdangtsü atema benjungtepdang nisung kanga longsolongben masütsüla," ta Dr Bhargava-i metetdaksü.

Union Health Secretary, Rajesh Bhushan-i, Brihostibar tashi nung vaccine dose crore 72 dak tema agütsüogo aser May

ita nung anogo shia vaccine dose lakh 20 shi agüja aliba nungi September ita nungbo anogo shia vaccine dose lakh 78 shi agütsüdar, ta metetdaksü.

"India nung tain nütsüing shilem 18 nembo dose anaprongla agütsüogo aser tain nütsüing shilem 58-i mezüingbuba dose agiogo," ta paisa metetdaksü.

India nung ano nisung 43,263 dak coronavirus putetogo aser tang tashi nungbo nisung 3,31,39,981 dak iba tashidak putetogo, ta Union health ministry-i metetdaksü.

Tesüiba ghonda 24 tsüingda India nung nisung 43,263 dak coronavirus putetba nungji Kerala nungi nisung 30,196 densema lir.

Tesüiba ghonda 24 nungsa linük nung coronavirus agi shiranger 338 süogo aser tang tashi nungbo iba tashidak agi asür ajak senteper 4,41,749 jungogo.

Tang linük nung coronavirus agi teshirangdakpur 3,93,614 lir, aser ibaji coronavirus caseload nungi shilem 1.19 lir.

India nung tang tashi nung iba tashidak agi shiranger 3,23,04,618 anepogo aser September 8 tashi nung samples crore 53.68 tendangogo, ta Health Ministry-isa metetdaksü.

**GOVERNMENT OF NAGALAND
DIRECTORATE OF TECHNICAL EDUCATION
NAGALAND: KOHIMA**

NO. DTE/SCHO-PS/AICTE/21 Kohima, dated the 8th September, 2021

NOTIFICATION

Itis hereby informed that the online Portal for submission of applications under AICTE Pragati scholarship Scheme for girls students (Fresh & Renewal) & AICTE Saksham Scholarship Scheme for specially -abled students (Fresh & Renewal cases) has been opened & last date for submission of online applications is 30.11.2021. The details of online portal for various schemes are as follows.

Sl. No	Scheme	Portal address
1	AICTE Pragati Scholarship Scheme (Fresh applications 2021-2022 batch & Renewal application 2020-2021 Batch)	National Scholarship Portal https://scholarships.gov.in
2	AICTE Pragati Scholarship Scheme (Renewal applications - 2018-19 & 2019-20 Batch)	AICTE web Portal- https://www.aicte-pragati-saksham.gov.in/
3	AICTE Saksham Scholarship Scheme(Fresh applications .2021-2022 .Batch & Renewal application -2020-2021 Batch)	National Scholarship Portal https://scholarships.gov.in
4	AICTE Saksham Scholarship Scheme(Renewal applications -2018-19 & 2019-20 Batch)	AICTE web Portal- https://www.aicte-pragati-saksham.gov.in/

The guidelines of each scheme are available at AICTE website. The students may submit their Fresh & Renewal application at the respective portal. The students are advise to submit their online application well in time so that their institutions are able to verify applications within the prescribe timelines.

The last date for first level of verification of applications (fresh and renewal cases) by institutions including defective applications on or before 15th December 2021.

The details of online portal for Institutions for first level of verification of online applications are as follows:

Sl.No	Scheme	Portal Adress
1	AICTE Pragati&Saksham Scholarship Scheme (Fresh applications - 2021-2022 batch & Renewal application -2020-2021 batch)	National Scholarship Portal https://scholarship.gov.in
2	AICTE Pragati&Saksham Scholarship Scheme(Renewal applications -2018-19 & 2019-20 Batch)	AICTE web Portal- https://www.aicte-pragati-saksham.gov.in/institute/login.php

The eligible institutions are also advised to verify applications of their students immediately after receiving the applications on respective online portal. For any queries one may address their mail to State Nodal Officer at dtenagaland@gmail.com

(NUNGSANGMENLA IMCHEN)
Ex-Officio Director



Afghan sorkar bukuma aser Taliban anema aser Pakistan-i Taliban nungitba anema Olympia, Washington nung aliba Capitol nung rally ka aliba mapang nisung kati 1990s tiyonglen aser 2000s tetenzüklen amshiba Afghanistan indang nisan ka amer aliba noksa ka yangi angur.

China-i Afghanistan nem sen million \$31 jenjang teyari agütsü

Beijing, Rongjui/Sept. 09 (Agencies): Taliban-i sorkar tasenba nung züngsemtem tenüng sandongba mapang ka nung China-i Afghanistan nem coronavirus mozü densema sen million \$31 alang teyari agütsü, ta sangdongogo.

Afghanistan kidanger linüktem, Pakistan, Iran, Tajikistan, Uzbekistan aser Turkmenistan indang foreign minister tem den Bodhbarnü senden amenba mapang Chinese Foreign Minister Wang Yi-i iba osang ya sangdonga liasü.

Iba ajungben rongdak teyari nungya jang, mongpu nung amshiba teyari, mozü aser COVID-19 vaccine doses million asem dena lir, ta Wang-i ashi.

Rara agi raksar aliba linük yanglutsü atema China ya "main partner" asütsü, ta tawa Taliban-i sangdonga lir.

Bodhbarnü iba senden nung Wang-i jembiba mapang, Afghanistan ya kota masüba jenjang ka nung lir, kechiaser parnok COVID-19 tashidak densema meimchir asoshi lendong tesashi ajurua lir, ta ashi.

"Afghanistan atema timtem tasen agütsütsü asoshi linük karibo yimtenren, rongsenketzüng aser senotsü amshitsü akok," ta ashi.

China ya Afghanistan den arütsüa lir, kong Taliban-i Mongulbarnü sorkar tasen ka sangdonga lir, kong United States-i bendenba 'wanted list' alirtem densema lir.

Humanitarian aser health tsütsü teyari agütsüba den külemi China-i rongnendak tesemtem lapoka aser refugee aser migrant tem ketdangsuba aser kiralongra anema nokdangba aser temesepba mozü anema raraba nunga

amalitepa Afghanistan yaritettsü, ta Wang-i ashi.

Iba virtual senden nung Wang-isa, America nunger sepaitem ainshiba sülen Afghanistan yaritsü atema US aser par tembar linüktem mapa lir, ta ashi.

"United States aser par tembar linüktemi mitkar teka sangshiba maparen tembangba ya parnoki khuret abenba tetenzüker ka asütsüla ta alimai repranga atar," ta Wang-i ashi.

Afghanistan nem teyari balala agütsütsü asoshi danga linük dang nungi parnok shilem tuluba lir."

Region nung yimji-yimjung alitsü atema telok ajaki itdangiterba maparen lemsatepba nung tashi itshitsüla, arütsü aziökba nung amalitep akatsüla aser kiralongrar teloktem samadaksütsüla," ta pai ashi.

Morocco parliamentary election nung ruling party tamakok ajuru

Rabat, Rongjui/Sept. 09 (TYO): Morocco indang parliamentary elections agiba nung iba linük mapang talangka yimsü süa aruba telok ya liberal teloki tsükdaktsüogo, ta interior minister-i provisional result ka sangdonga liasü.

Justice and Development Party (PJD) ya parliament nung menden 125 liasü saka menden 12 kisüng nung takok angu, koba liberal nungi par den tokteper National Rally of Independents (NRI) aser Authenticity and Modernity Party (PAM), aser centre-right Istiqlal Party (PI) temi menden timba nguteta liasü. Iba osang ya Brehostibarnep sangdonga liasü.

NRI teloki menden 97 ngutetogo, ta election ketdangsurtemi sangdongba mapang par telok headquarters

nung benjongtepa liasü, koba election nung toktepa teloktem rongnung menden timtiba ngutetba alitsü.

PAM ya tanabuba jenjang nung menden 82 nguteta lir aser iba sülen PI teloki menden 78 nguteta lir.

Bodhbarnü parliamentary election nung shilem agir ya shilem 50 dang tera agi timba liasü, saka ibai 2016 election dang nungia timba lir.

Vote agütsütsü ozüng tasen yangluba ajanga party tulutemi taoba mapang ama menden aika mongutet südi, ta asadanger temi ashir aser ibayongji taoba parliament ana nung party tulutiba aliba moderate PJD ya akoksa.

Morocco ya constitutional monarchy ka lir, saka chubai tashi tulu ama lir. Züngsem 395 aliba parliament nungi menden timba ngutetba party nungi pai

ato kilonser aser tongtipang minister tem shimteter.

Nütsüng yongsük million 37 aliba linük asoshi chubai rongsenketzüng sentongtem yanglur aser sorkar tasenbai mapa kuma inyaksü asoshi terenlok sentong yanglua lir.

Chubai shilem tulu agiba ajanga political party temi education, health, employment aser social welfare nung rangloker.

2011 nungi party tulutiba ka ama aruaka PJD yagi pari maginüba ozüngtem menokdangtet, aser yangji education nung French oshi amshiba aser temang anepalutsü atema cannabis amshitsü melaba dena lir.

PJD ajanga Bodhbarnü sangdong ka nung par den tokteper temi vote alitsü, ta aitsü saka kuli tejangja ka magütsütet.

North Macedonia COVID hospital nung mi adok; nisung ter asü

Skopje, Rongjui/Sept. 09 (Agencies): Northern Macedonia nung coronavirus agi shiranger anepalutsü aoshi khen atema yangluba mozüki ka nung mi adoka nisung ter asü, ta ketdangsurtemi ashi.

Iba Balkan linük northwest tsütsü Tetovo tesem nung Bodhbar nikongdang mi ya adok, ta Ato Kilonser Zoran Zaev-i ashi, shiba osang angashili jila yagi oa liasü.

"Tetovo COVID-19 centre nung lendong tulu adok. Tapokba ka ajanga mi adokdaksü. Mi bo remseptet saka nisung takum jenti sama," ta Zaev-i Twitter nung ashi.

"Tang tashinung nisung 10 asüba jangjatetogo, saka asür ya timba alitsü akok," ta Health Minister Venko Filipche-ia Twitter nung ashi aser asür kinungertem den asükhu lemsatepa liasü.

Tetovo jila anüolen tsütsü mozüki nung mi tulu jangrua aliba noksatem sayuogo aser mibener tem iba tesemi kanga ilonga oa liasü. Ghonda ishika lir mi ya remseptet.

Aonung 9:00 ako (par mapang) meta mi adokba mapang mozü kidang shiranger kwi liasüar mejangja, ta sorkar ketdangsur kati pa tenüng memetetdaksüi osangbener dang shia liasü.

Linük yutsür aoba asoshi tatok meshir: Ashraf Ghani

Abu Dhabi, Rongjui/Sept. 09 (Agencies): Taoba Afghanistan Tir Ashraf Ghani-i linük yutsür United Arab Emirates nung oa jenokba sülen Afghan nüburttem dang tatok meshia liasü.

"Kabul yutsüba ya kü takum nung telemtetba tasaktiba liasü. Yimya balaka nung metembangtetba atema sasa bilemer," ta pai ashi.

Taliban telungpurtem August 15 nü linük yimtibai aitba mapang Ghani-i arrsanga Afghanistan yutsür ao.

Pai nüburttem senzüka yutsütsü tebilemba meliasü saka lenmang ajunga agi ibai dang liasü, ta ashi.

Pai sen million \$169 shi bener UAE bushia ao ta tai tongloksüba atema pai maneni aitsü aser yangji tamendak dak maka, ta ashi.

Bodhbarnü Twitter nung sangdong ka lemsatepba nung, azüdokshi lendong tulu nungi paidoktsü mechi linük yutsütsüsa akum, ta Ghani-i ashi.

"Palace security-i ajungshiba ama ni linük yutsür ao, shirnoki kü dang linük nung aliba ajanga 1990s civil war mapang ama yimti nung rara adoktsü akok, ta shia liasü. Kabul aser lar nütsüng yongsük million trok kumzüksü mechi ni ya inyak," ta pai ashi.

Afghanistan ya democratic, yimjiyimjung aser tashi temeden temeja aliba linük ka kumdaktsütsü asoshi ni küm 20

Nisung 50,000 shi aliba jila nungya coronavirus tashidak agi menepa alirtem anepalutsü atema iba mozü kidang taoba küm modular COVID-19 unit ya yanglua liasü.

"Mi ya kanga tulu liasü, kechiaser mozüki ya modular lir, kong plastic amshia yangluba lir," ta Tetovo deputy fire chief Saso Trajcevski-i osangbener dang ashi.

"Mi remsepba mapang onoki asürtem aniteta liasü."

Iba lendong nung yirur aliba nisungtem Skopje nung aliba mozüki bushia bener ao. Skopje ya North Macedonia linük yimtiba lir.

North Macedonia nung nütsüng yongsük million ana shi lir, aser iba linük indang healthcare services timtem nung lir.

August ita tiyonglen ka nungi iba linük nung coronavirus cases tali akumba ajanga sorkari tenokdangba tali agütsü aser item rongnung café aser restaurants atema health passes amshir.

Tesüiba ghonda 24 tsüngta iba linük nung nisung tasen 701 dak coronavirus putet aser tasüba 24 liasü.

Tetovo nung ethnic Albanians timba lir, aser linük nung coronavirus cases timtiba aliba jila rongnung ibai ka lir.

bendanga agütsür inyaka aru, ta pai ashi.

Kü jakdang yimsü süa alirtem den kasa yimya nung kü mapang tembangba atema temolung taroktiba nungi sasa bilemer, ta Ghani-i ashi.

Taoba mapang tir inyaksang arishi küm 72 tain, Ghani-i linük yutsür aoba asoshi Afghan nung yimten yimsüsür dangartemi kanga sashia aitsü, saka pai linük yutsür aotsüsa tensa aruba ya nüburttem nem metetetdaksütsü, ta ashi.

Pa pua tepsettsü jenjang nung aliba ajanga pa indang security team-i pa linük yutsür aotsü ajungshi, ta August 18 nü Ghani-i live Facebook nung shia liasü.

Kabul nung tir aliba kidangi Taliban telok aitba mapang parnoki dakdang ka nungi dakdang ka nung ni bushia liasü, ta pai ashi.

Pai linük yutsür aoba mapang sen aika bener ao ta jembiba metongshija, kü indang sandal semzükter tsüngsem asemtsüa memela, ta Ghani-i ashi.

Hopta asem tejakdang Afghanistan amokbangba sülen Taliban-i linük nung yimsü asütsü asoshi hopta tetenzüklen tebur kisüng aliba interim government ka tentetba sangdonga liasü.

Kabul aser Afghan northeast tsütsü Badakhshan province nung tetsür telok kari tetsür minister maliba sorkar ya magizüktsü, ta Bodhbarnü longkak aita liasü.

Kiphire nung 'Horticulture Farmers Day' mungogo



Kiphire, Rongjui/September 09, 2021: Horticulture Farmers Day sentong nung RM Tripathi-i telok den jembiba noksa nung angur.

Kiphire, Rongjui/September 09, 2021 (TYO): Brehostibarnü, PMKSY kübok DHO Kiphire ajanga "per drop more crop" omen nung ajemdaker Kiphire nung Horticulture Farmers Day ayongzüka liasü, ta sangdong ajanga metetdaksü.

Iba sentong nung Senti Longchar, DHO Kiphire meden liasü aser pai telok pela agizük. Senti-i telok dang iba sentong agiba indang metetdakja liasü.

RM Tripathi, SM Commandant 41 Assam Rifles, alakteta tejaoker ama iba sentong nung aden aser

sentong nung adener aluyimertem dang horticulture crops' talisa mersü, süngolemba aser tanga tsünüsembongtsü balala yoktsü asoshi ajungshia liasü.

Vegetables Growers Association, Nagaland indang president, Chumlongse Sangtam-i, metsüjangtem junga bendentsü aser local market nung nüburtemi sapua aliba aonsotsü/süngolemba tem tali tsünütsü asoshi aluyimertem ajungmeso.

Maneni, Technical session nung, shisalen sayurji Senior Scientist KVK Kiphire, Dr. N

Khumdemo Ezung liasü.

Iba sentong nung, Kiphire district kübok yimtsüung 11 nungi aonsotsü/süngolemba lu ayimer 35 denogo. Sentong nung adenertem nem tsüngküm mongpu nung yokba süngolemba metsüjangtem angati lema agütsüogo. NEC aser MIDH programme kübok aluyimer nem item metsüjang lema agütsü.

DHO sangdong ajanga angazükba agi, Kiphire district nung külem sendaktepa alirtem atema training sentong balala ayongzüksü asalentong yangludar.

Heningkunglwa nung anaemia awareness & screening camp agiogo

Dimapur, Rongjui/September 9 (TYO): Department of Social Welfare, Jalukie ICDS Project-i achaayanga Heningkunglwa Village Council Hall nung September 8 nü block level anaemia awareness aser screening camp sentong ka ayongzüka katsüogo.

Iba sentong nung shisalen agütsürji CDPO Jalukie, Namhuheing liasü. Iba camp ya nüburtem nem anaemia dak sendakba nung tangazükba agütsütsü nükjidong nung aser September ita tepeyong Poshan

Maah (1st - 30th September, 2021) sentong ayongzüka amungba nung shilem ka ama ayongzüka kaogo.

Screening camp magi tsüngda sentong tatsüka agiba mapang CDPO Jalukie-i, Rashtriya Poshan Maah, 2021 nükjidong, action plan aser koba telok asoshi ayongzüka agir, iba indang metetdaksü. Iba dak sendakba nung pai iba sentong takok ngua inyakyonga aotsü atema Village Council, AWW aser sentong dak sendaka alir ajak dang teka amteper inyaksü mepeshia liasü.

Paisa, temang liromedema aser anema toktsütsü aser meremejua alitsü koda tongtibang, iba dak rangloker jembu. Maneni CDPO-i Sentepa aliba lokti dang anema alitsü atema temang den apetba chiyongtsü tajung achitsü ajungshia liasü.

Sentong nungsa District Programme Assistant, PMMVY Peren-i, Pradhan Mantri Matru Vandhana Yojana (PMMVY) indang metetdaksü. Iba sentong ya Supervisor Jalukie, Kalivi Zhimomi lenisüba nung agi.

Peren DC-i metetdaksür

Dimapur, Rongjui/September 9 (TYO): Gandhi Jayanti 2021 amungba anogo Raj Bhavan-i Nagaland nung aliba kaketshirtem atema otsünü online ajanga zülutepba tetoktepba ka ayongzüko. Iba tetoktepba ya "Relevance of Gandhiji's Thoughts for Building a Peaceful and Prosperous Nagaland" onük nung ajemdaker tokteptsü.

Iba dak sendakba nung Peren Deputy Commissioner, Sentiwapang Aier, NCS-i, Peren District kübok temsüa aliba kaketshirtem dang iba tetoktepba nung shilem agitsü ayongzüko.

Iba tetoktepba nung Peren District kübok aliba high school

aser higher secondary schools kaketshirtemi shilem agitettsü. Otsünü ya ojang 2000 shi zülutsü. Otsünü zülüzükba sülen online ajanga DCPERENessay2021@gmail.com. nung submit asütsü aser tatembangbuba anogoji September 22, 2021 asütsü.

Kasa mapang nung iba tetoktepba nung mezüngbuba jenjang nem senpet sen 25,000 den Nagaland Angh nungi kuli kaketsütsü aser tanabuba jenjang nung takok angur nem senpet sen 15,000 den Nagaland

Angh nungi kuli kaketsütsü. Temalen shisema aliba email nung aruba otsünü ajak Deputy Commissioner tekolak ser Evaluation Committee kati asadangtsü aser committee-i takoker shimtsü. Iba tetoktepba nung takok angurtem nem October 2 nü Mahatma Gandhi asoba anogo Raj Bhavan nung benjung amungba mapang tetushi agütsütsü.

Tetoktepba nung shilem agirtem ajaki pei tenüng, School/Class/Phone number tejangja agütsütsü metetdaksüogo.

LAND FOR SALE Old Showuba Area
 i) 5 Pura (Rs.90 per Sq.ft.) (ii) 14 Pura (Rs. 110 per Sq.ft.)
 iii) Diphupar B 10,000 Sq.Ft (Rs. 350/- per Sq.ft)
 For more details contace 9856603713

Küm 92 ajungba tepela anogo

Mrs. L. Bendangsangla Imchen (Mangmetong)



Asoba küm 10.09.1929

Tsüngrem taochi nung küm 92 tashi abensa-a anir aruba asoshi Pa tenüng asanger. Ano onok akhümdong ka ama süa alitsü maneni Tsüngremi nü nem anema aliba aser arishi talang moajangma ta onok sarasadem.

~ Temeim Chirnur, Semchirtem aser Kinungertem.

Pelaba Lemsateper

"Kechiaser ni asoshi taküm alibaji Khrista, aser tasütsüji tajangzük lir." Filipi 1:21

Ozü akümdong tebuti asür **I.Sako Jamir**, Mongsenyimti village. Pa shiranga alidang nungi tasünü tashi shirnokisa aria bilema tamang, nübu, rongsen aser shisatsü tajungtiba agi yaritepogo nenok ajak dang kangasa pelaba lemsateper.

Nenek mapa tajung ajak asoshi Tebu Tsüngremi nenok ajak moajangma.

Temeim Kinungtsü, Chirnur, Semchlr & Kinungertem.



15.08.1932 - 25.08.2021

Mulungnen O

"Tenüng tajungji senti mozü dang tajungba, aser tasünüji taso nü dang tajungba". Sayutsüngir 7:1



K. TEMSÜKABA IMCHEN
 ASO : 7th Oct 1941 ASÜ : 13th Aug 2021

Ozü temeim Obala Asür K. Temsükaba Imchen (Tsüngdenba) Chungtia manemi aliba mapang nungi tenzüka pa ali wadang tatem tashi, maparen aser inyaksangshi balala nung kija, kibong aser lokti kwikati ozü den lenmang balala nung asükhu tashi yaritepogo nenok ajak dangi tsüngdong marutet nung iba osang kaketsü ajanga ozü temulungjang taroktiba nungi kanga pelaba lemsateper.

Talisa, Dr. Alemba MD, Dr. Kilang MD, IMDH Mokochung aser Doctors, Nurses aser Staffs Ayursundra Super Speciality Hospital Guwahati danga kanga pelaba lemsateper.

Ajak takoksang Tsüngremi nenok mapa tajung lepa moajangma ta ozü tamang sarasadem aser teimla.

~ Temeim Jala, Apang, Semchirtem aser Kinungertem.

Süngratsü Ozükümtsür Telongjem

Mokokchung Town

TENÜNGSANG AGÜTSÜR

Ozü Elangtsür Kongro **NARONLA Ozüküm**, D/o. IMRONGSASHI Ozüküm, lai MSC Mathematics, Kohima Science College Nagaland nungi Gold Medal angu aser Kongro **YONGKONGSANGLA. R Ozüküm**, D/o. Lt. REPAKOKBA Ozüküm, Nagaland Christian Residential School Mkg. nungi State Level Teachers Award angu. Tenati 2021 küm Elang kidong nem konang tetushi bener arutsüba asoshi tenüngsang agütsüba den tepela lemsateper.

Ano tarutsü nunga nunga nena wadang nung Teyanglur Tsüngremi maneni moajang ta onok teimla aser sarasadem.

Sd/-
TAMAINLA OZK
 President

Sd/-
TONGPANGKOKLA OZK
 Secretary

US Open 2021: Djokovic o Sakkari na semifinal-i iogo



New York, Rongjui/September 09, 2021: U.S. Open tennis tennis asayamung tetsür kija quarterfinal asaya nung, Greek tsür Maria Sakkari-i Czech Republic tsür Karolina Pliskova madak takok ngur sülen tangokba noksa ka yangi angur.

New York, Rongjui/September 09, 2021

(Agencies): Brehostibarnü, US Open tebur kija quarter final asaya nung Novak Djokovic-i mezüing set tamakok anguba dak alaka, pai 5-7, 6-2, 6-2, 6-3 agi Italy nung Matteo Berrettini tsükdaktsüba sülen semi-final tongogo. Serbia nung Djokovic-i otsüsüsüsa 21buba Grand Slam (Major) title akoktsü asoshi asaya ana nung takok angutsü anünga lir.

Tennis asayamung nung Djokovic aser Berrettini na asemben dang asaya lir; aser asaya asem rongnung taküm anaben tashi asayaogo, koba Wimbledon final aser French Open quarter final asütsü. World No.1 Djokovic-i asaya anaprongla set pezü nung takok angu.

Arishi küm 25 Matteo-i Djokovic indang Grand Slam mangdang raksatsütsü asoshi asaya tenzük, saka pai iba maongka mengutet. Matteo-i iba asaya mezüing set takok anguba dak alaka, tanüingba set asem makok. Mezüing set nung pai break point 5 agitsü maongka angu, saka ka dang agitet.

Djokovic-i taruba round (semifinal) nung Germany nung seed pezübuba Alexander Zverev den asayatsü. Taoba ita Tokyo

Olympics nung Djokovic-i 'Golden Slam' angutsü teimla nung asaya liasü, saka semifinal nung Zverev-i pa tsükdaktsü.

Tebur kija quarter final asaya tanga ka nung, Zverev-i 7-6 (6) 6-3 6-4 agi South Africa nung Lloyd Harris madak takok angu. Zverev-i asaya 16 tashi atonga takok angur asütsü.

Kasa asayamung tetsür kija asaya tanga ka nung, Maria Sakkari-i ghonda ka ser tesadangka nung Karolina Pliskova madak takok ngua semi-final tongtetogo.

U.S. Open tetsür kija semi-final tongtettsü atema, Greek tsür Maria Sakkari-i asaya amokbangadok aser lai 6-4 6-4 agi Karolina Pliskova tsükdaktsü. Maria-i iba takok ya külem Greek pur nem bendanga agütsü. Taküm tsüklawa mongpu mapang Greek nung merok mi lendong ajanga nübur aika temtemogo.

Arthur Ashe Stadium nung Sakkari-i quarter final tashi kanga dang junga asaya arur sülen semifinal tongteter asütsü. Iba asaya nung, Pliskova-i aibelentsüsa Maria Sakkari-i tasa balala amshi aser mezüing set takok mangudang, lai yakta break point angu.

Roland Garros semi-finalist Sakkari-i kanga dang kümdanga

serve yok, koba ajanga 0-30 agi Pliskova tesülen ser tanabuba game tenzükba sülen, lai service point 22 shi atonga takok angu.

Maria-i Quarter final takok anguba ya la nübur (Greek) nem bendanga agütsü, kong merok mi lendong 500 dak tema atalokba ajanga Greek nung nisung meyisa meyi pei talidak toktsür tangai aotsüsa kümadok.

2016 küm Pliskova-i iba asayamung final tongteta asayar külen nungi, taküm Flushing Meadows nung la tasembenbuba quarter final nung tamakok angur asütsü.

Tetsür kija round of 16 nung, Maria Sakkari-i taoba mapang US Open takok angula Bianca Andreescu den ghonda 3 ser minute 30 shi asaya takok ngur sülen, quarter final nung lai anibelemba kecha mesayui tashi agüja asayaogo.

Maria-i British tsür Emma Raducanu den semi-final asayatsü. Qualifier ka ama, Flushing Meadows nung Emma asaya tenzükür külen nungi lai asaya set ka nung danga tamakok ngudanga mali.

"Iba asayamung tenzükür külen nungi Emma-i junga asaya aruogo. Ajisüaka, nia kü dak temolung lemteta asayatsü," ta Maria-i ashi.



New Delhi, Rongjui/September 09, 2021: Brehostibarnü, Ato Kilonser, Narendra Modi-i 2020 Summer Paralympics nung shilem agir Indian contingent den ajurutepba mapang tangokba noksa ka yangi angur.

ASU-i 21buba NSF Martyrs' Memorial Trophy ayongzüktsü

Kohima, Rongjui/September 09, 2021 (TYO):

October 2021 nung, Angami Students Union (ASU)-i "Goal for Peace" omen kübok 21buba NSF Martyrs' Memorial Trophy 2021 ayongzüktsü, ta ASU sangdong ka ajanga metetdaksü.

Asür Kekuojalie Sachii aser asür. Vikhozo Yhoshii na bilemteta aser tena nem aküm tetushi agütsütsü asoshi NSF

Martyrs' Memorial Trophy ayongzükür.

Anungji, ita piyong ayonga asayatsü aliba asayamung atema, shilem agitsü jangra alir team ajak dang renemshia atatsü asoshi, ASU-i mepishir.

NSF Martyrs' Memorial Trophy atema entry form aser tzüzüing-ozüing tem hopta ka tsüingda nübur dang metetdaksütsü, ta ASU-i shisem.

England indang T20 World Cup squad nung Stokes maden

Manchester, Rongjui/September 09, 2021

(Agencies): Taruba ita Oman aser United Arab Emirates nung T20 World Cup atema, Bodhbarnü England indang squad sangdongogo. Ajisüaka, squad nung Ben Stokes maniok.

Stokes temeyong yiruba aser tanga timtem aliba ajanga, tang pa cricket asaya nungi sodi agir lir. Item timtem nungi Stokes taneptsü junga mangu tashi pai cricket masayatsü.

2019 küm England-i 50-over World Cup takok angu aser iba asayamung final nung arishi küm 30 tain all-rounder, Stokes-i team atema bendanga agüja asayaba alimai nguogo. Taküm, July ita nungi Stokes-i cricket asayamung ka nungdanga shilem agidanga mali.

"Durham indang Ben Stokes selection nung mezüingok aser pa timtem aliba ajanga cricket asaya ajak nung anener lir," ta England and Wales Cricket Board sangdong ajanga metetdaksü.

Ajisüaka, England squad nung, fast bowler Tymal Mills anisemogo. 2017 küm tesüsa cricket asaya (international) nung shilem agir külen nungi, taküm iba asayamung nung pai mezüing shilem agir asütsü.

Taküm season indang T20 Blast nung Mills-i junga asayaogo aser pa Southern Brave tenüing nungi asaya. Iba den külemi par teloki Hundred asayamung kokogo.

"Shilem ajunga ayimjema asayatsü asoshi onoki squad tetemjen ka shimogo ta amanger aser alima nung asayar tajungtiba den toktepa asayamung ka nung parnoki takok ngua shilem agitsü imlar," ta England head coach, Chris Silverwood-i ashi.

"Iba squad nung Tymal Mills anioktsü kanga dang tetemsü aser tesüiba küm ishika nungi pai junga asaya aruogo, ajisüaka aruya aliba asayamung nung team atema pa dak aliba sempet tajungtiba amshia pai iba jenjang

nung takok ngua asayatsü onoki imlar," ta Chris-i shisem.

"Pai bowling junga aonba asadangtetogo aser T20 format nung pai Sussex aser Southern Brave anir asayaba mapang, temaba jenjang nung pai asayatetsüsa pa sempet ajanga kuli sayuogo," ta Chris-i ashi.

Eoin Morgan-i aniba squad nung, taoba '50-over World Cup' takok angur asayatem talisa Jason Roy, Jonny Bairstow, Jos Buttler, Adil Rashid, Chris Woakes aser Mark Wood nung dena lir.

Tan season nung, England aser Pakistan na T20 asayaba mapang, ball 42 nung run 100 yangluba sülen, England T20 World Cup squad nung, Lancashire nungi all-rounder Liam Livingstone anisemogo.

Fast bowler, Jofra Archer tekatsü yirur aliba ajanga, pa iba squad nung maniok. Kasa mapang, imlaa ataba ama, züingsem 15 squad nung, Test skipper Joe Root-a maden.

Surrey club nungi asayar, Tom Curran aser Hampshire club nungi asaya ana Liam Dawson aser James Vince nung 'travelling reserves' ama shimogo.

T20 World Cup asayamung dak sendakba nung renemshiba shilem ama, England-i Pakistan den T20 series asaya ana densema warm-up match pezü asayatsü sentong lir.

Iba World Cup, koba October 17 nungi November 14, 2021 tashi asayatsü, iba asayamung matongdang England squad nung asayatem melentsü asoshi October 10 tashi mapang lapoktsür.

* England squad

Eoin Morgan (capt), Moeen Ali, Jonny Bairstow, Sam Billings, Jos Buttler (wkt), Sam Curran, Chris Jordan, Liam Livingstone, Dawid Malan, Tymal Mills, Adil Rashid, Jason Roy, David Willey, Chris Woakes, Mark Wood

* Travelling reserves:

Tom Curran, Liam Dawson, James Vince

BILEMDANGANG

"Mashimaluri jembiba nung tashitemeteri teti shisadanger."